

D. c. 32.

1) Hyperius, Andr.

nebst 2) - 7)

MF(1-7)

3. die Druckmarken

5  
h  
II  
25

Handbüchlein  
Der Vorzeichnus/ etzlicher  
feiner vnd fürnehmer Sprüchlein /  
aus heiliger Göttlicher Schrifft/ vnd anderer  
Gelehrten Scribenten büchern gezogen:

Alle auff Drey dinge gerichtet.

Aus welchen viel schöner vnd nothwen-  
diger Lehren zunehmen / vnd zu lernen sind /  
Christlichen vnd Gotteseligen Herzen zu gut in  
Druck vorfertiget.



Von dreyen Dingen sagt dis Büchlein /  
Welche gros sein vnd nicht klein /  
Gezogen aus der Weiligen Schrifft /  
Denn es guts vnd böses betrifft /  
Darzu sich der Mensch müge lenden /  
Vnd vom bösen thue abwenden /  
Vnd auch aus Sprichworten genommen /  
Wer sich dran kehrt bringet frommen.

ANNO 1588.

Faint, illegible text, likely bleed-through from the reverse side of the page.




Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.



Den Ehrnuesten / Erharn  
vnd Wolgeachten Herrn Wüntzmei-  
stern / Schmidtmeister vnd Gesellen /  
des Churfürstlichen löblichen Wüntz-  
wergs zu Dreszden / Weinen  
großgünstigen Herrn / vnd  
guten Freun-  
den .



**S** Ehrnuechste / Ehr-  
bare vnd Wolgeachte /  
Großgünstige Herrn / vnd gu-  
ten Freunde / Die weisen Hei-  
den haben ihre vnd allezeit seine  
Lehren vnd Sprüche / von gu-  
tem wandel vnd sitten / auff das  
aller kürzeste zusammen gefas-  
set / den ihrigen vorgehalten / auff das sie in be-  
trachtung vnd anschawung derselben / gleich als  
durch eine Richtschnur zu allen guten sitten vnd  
thugenden / gewehnet vnd gehalten würden. Wel-  
ches denn von gemelten Heiden / nicht allein sehr  
A ij rühmlich

rhmlich vnd loblich/ sondern auch den ihrigen sehr  
nützlich vnd dienstlich gewesen ist.

**W**eil dann der Heiden Schrifften bey den ih-  
rigen nutz vnd frommen geschaffet / Wie viel  
mehr wird vns / die wir Christen / vnd zu dem wa-  
ren erkentnis kommen seind / nützen vnd dienen /  
was vns aus Göttlicher heiliger Schrift vorgehal-  
ten wird / darinnen wir viel schöner vnd herrlicher  
Lehren vnd Sprüche finden / so vns nicht allein zu  
dieser zeitlichen / sondern viel mehr zu der ewigen  
wolfarth / ja zu vnserm heil vnd seligkeit / dienen vñ  
anweisung geben / Darumb wir solches billich (weil  
sie weit höher vnd grösser denn der Heyden) in gros-  
sen werdt vnd ehren halten.

**S** Ich hab ich nun aus erwehnten vr-  
sachen / mit sondern fleis vorgemelte ezliche  
feine Sprüchlein vnd Lehren auff das aller kürzte  
zusammen gedrucket / vnd alle auff drey ding gerich-  
tet / Wil hoffen / so sie Christliche vnd Gottselige  
Herzen lesen werden / sollen sie ohne frucht vnd from-  
men nicht abgehen.

Ich hab aber aus sondern vrsachen E. E. vnd G.  
solches zu einem glückseligen / gnadenreichen neuen  
Jahre / dediciren vnd zuschreiben wollen / mit fleißi-  
ger

ger bitte / E. E. vnd G. wollen diese meine gut  
vnd wolmeinende Arbeit günstig auffnehmen vnd  
erkennen.

Gott helff das wir aus solchen vnd andern/  
vnser leben zu Gottes furcht vnd guten leben vnd  
wandel aufstellen mögen/ Amen. Datum Dres-  
den / am tage des heiligen Apostels Thome / Nach  
Christi geburt / im 158. Jahr.

E. E. V. G.

Dienstwilliger

Gimel Bergen von Lübeck/  
Buchdrucker.



A III

Dam

Dem Einigen Allmechtigen / sey die Ehre /  
zu aller zeit /

Dem Einigen Untödelichen / sey die Ehre /  
in Ewigkeit /

Dem Einigen Herrschenden / sey die Ehre /  
ohne ende.

Frü auff stehen / gerewet nicht / Siebt  
Reichthumb.

Zur Kirchen gehen vorsemet nicht /  
Gibt Glück.

Almosen geben armet nicht / Gibt  
Seligkeit.




Alter ohne Weisheit /  
Weisheit ohne Werck /  
Doffart ohne Reichthumb /  
Reichthumb ohne ehren.  
Adel ohne Thugendt.  
Herrschafft ohne Landt.  
Volck ohne zucht.  
Stedte ohne Gerichte.  
Gewaldt ohne Gnade.  
Jugent ohne Furcht.  
Frawen ohne Scham.  
Geistliche ohne Friede.



Diese obgenante Zwelff stücke /  
Machen der Welt gros vngelücke.

Das

Das Erste Theil saget /  
Was da GOTT belanget /  
vnd der Menschen heil.



Drey

**D**reyfaltig ist Gott / vnd doch einig /  
Nemlich / Der Vater / der Sohn / vnd  
der heilige Geist.

Drey ding sind die Zeugnis geben im Hie-  
mel / Nemlich / der Vater / das Wort /  
vnd der heilige Geist.

Drey ding sind / die Zeugnis geben auff  
Erden / Nemlich / der Geist / das Wasser /  
vnd das Blut.

Drey ding liebet die Welt / Nemlich / Wol-  
lust des fleisches / lust der Augen / vnd hoffart  
des leibes.

Drey ding sollen wir lieben / Nemlich / Gott  
den Allmechtigen / vnsern Nehesten / vnd die  
Tugend oder gute Wercke.

Drey Gebot sindt die GOTT betreffen /  
Nemlich / Du solt glauben an einen GOTT /  
du solt bey seinem Namen nicht vnnütlichen  
schwören / vnd du solt den heiligen tag heiligen  
oder feiren.

Drey ding die dem Heiligen Geist / vnd  
dem Menschen wolgefallen / Nemlich /  
Zintrech.

Eintrechtigkeit der Brüder / Liebe des Nächsten / vnd wo man vnd Weib sich wol begehen.

Drey Eigenschafften sein in Gott / Nemlich / die Gewalt / die Weißheit / vnd die Güte.

Drey ding sind Gott angeneh / Nemlich / die Kerwe / leidt sein die Sünde / vnd widergeben vnrecht gut.

Drey ding liebet Gott / Nemlich / den Glauben / die Hoffnung / vnd die liebe.

Drey Tugent hat Gott / Nemlich / Er ist der Allerhöchste / der Allmechtigste / vnd der gewaltigste König.

Drey ding soltu lieben / Nemlich / GOTTES forcht / Gottes Barmherzigkeit / vnd ein weises Weib.

Drey ding gefallen Gott wol / Nemlich / Ein recht Vrteil / graue Haar mit Weißheit / Vnd Regenten die wol regieren.

Drey ding wolt mir GOTT geben / Nemlichen / Gesunden Leib / Weißheit / vnd ein zimliche Narung.

B

Drey

Drey ding erheben das Gemüte / Nemli-  
chen / Gottesfurcht / die Stercke / vnd zeit-  
lichs Gut.

Drey ding werden nicht geschenkt / Nem-  
lichen / Gott lieben / fürchten vnd ehren.

Drey ding sind / daran Gott ein Wolge-  
fallen hat / Nemlichen / Au trew / an der  
liebe / vnd an sanfftmuth.

Drey Tugent hat die furcht Gottes / Nem-  
lichen / Giebet reichen Frieden / Gesundheit /  
vnd Hell.

Drey ding sind von **GOTT** / Nemlichen /  
Glück vnd Unglücke / Reichthumb vnd Ar-  
muth / das leben vnd der Todt.

Drey Ruthen hat **GOTT** / damit er die  
Welt straffet / Nemlichen / Thewrung/  
Krieg / vnd Pestilentz.

Drey ding werden von **GOTT** geliebet /  
Nemlichen / Gottes forcht / in deinem beruff  
bleiben / vnd an dem du hast begnügig sein.

Drey ding sind Ehrenlosz / Nemlichen / der  
Gott nicht fürchtet / der sein Vater vorlest /  
vnd der die Mutter betrübet.

Drey ding sind Gott ein greuel / Nemlichen /  
Unrecht

Vnrecht gut / leichtfertigkeit / vnd ein zwey-  
fache Zunge.

Drey ding sein im Himmel / vnd vnbe-  
greifflich / Nemlich / das kein Auge gese-  
hen / kein Ohr gehört / vnd in keines Men-  
schen Herz gestiegen ist.

Drey ding sollen wir haben / Nemlichen /  
einen Gott / einen Glauben / eine Gemeine  
Christliche Kirche.

Drey ding sind selig / Nemlichen / der von  
Gott nichts scheltet / der Gelübde helt /  
vnd der das Reichthumb nicht liebet.

Drey ding sind nicht zuuorgelten / Nemli-  
chen / Gottes furcht / die Weißheit / vnd die  
Demuth.

Drey ding sind / da uns Gott vor behüte /  
Nemlichen / vor zwier gekochter Speis / vor  
einem ungelerten Arzt / vnd vor einem bösen  
Weibe.

Drey ding machen ein ewigen Namen /  
Nemlich / Kinder zeugen / die Stad bauen /  
vnd ein ehrliches gezogenes Weib.

Drey ding sind wider einander / Nemlich /  
Weisheit vnd Thorheit / Gerechtigkeit vnd  
Vngerechtigkeit / gute vnd böse Zungen.

B ij

Drey

Drey ding erfreuen das Hertz der Menschen / Nemlich / der Wein / Musica / vnd die Liebe der Weisheit.

Drey ding werden langes Leben haben / Nemlich / der da Gott liebet / der seine Mutter ehret / vnd der dem Vater ehr erbeut.

Drey ding werden veracht / Nemlich / ein Fauler / ein ungezogener Sohn / vnd ein verrische Tochter.

Drey ding werden vbel gesprochen / Nemlich / Die Armen berauben / Den Dürfftigen vorschmehen / vnd den Hungrigen verachten.

Drey ding machen den Menschen blindt / Nemlich / Geschenck oder Gaben / falsche Lehre / vnd eigener nutz.

Drey ding beweisen die Sitten der Obrigkeit / Nemlich / das Volck des Königes / die Bürger des Bürgermeisters / vnd die Kinder der Eltern.

Drey ding sind erschrecklich / Nemlich / viel schreuen / vnehr Göttliches Namens / vnd der Stolzen hader.

Drey ding sol man sich nicht vnderstehen / Nemlich / einen Stein ober sich zu werffen /  
mit

mit heimlichen listen schaden thun / vnd der ein  
Gruben grebet / fellet selber drein.

Das Vnder Theil der Sit-  
lichen dinge / Aus den Sprüchen  
Salomo vnd Ihesus Syrach.



Drey arth hat die Sonne / Nemlich / Die  
Schöne / den Schein / vnd die Hitze.

Drey ding sind holdselig / Nemlich der Sone  
nenschein / eines Weibes Ehugend oder hold-  
seligkeit / vnd des Herrn im Hause Weisheit.

B ij

Drey

Drey ding erheben den Menschen / Nemlich /  
die Faste / das Gebet / vnd demuth.

Drey ding werden vom Menschen geliebet /  
Nemlich / weinen mit den Weinenden / klagen  
mit den Klagenden / vnd die Krancken bes-  
suchen.

Drey ding bleiben nicht vnnütze / Nemlich /  
die Liebe / die Demuth / vnd der Gehorsam.

Drey ding seind hoch zu loben vnd begnüg /  
Nemlich / der freude an seinen Kindern siehet /  
der seiner Feinde fall siehet / vnd der mit einem  
vernünftigen Weibe haushelt.

Drey ding sol man meiden / Nemlich / die  
Welt / die Sünde / vnd die Ketzer.

Drey ding zeigen des Menschen Hertz / Nem-  
lich / das Angesicht / die Kleyder vnd der  
Gang.

Drey ding machen vnselig / Nemlich / der War-  
heit widerstandt / die Lügen vorsechten / vnd  
die Sünde vorbergen.

Drey ding seind vnmüglich / Nemlich / Wer  
fert hinauff gen Himmel vnd herab? wer fast  
den Wind in die Hende? vnd wer bindet die  
Wasser in ein Kleid?

Drey

Drey ding haben nicht mit einander gemeinschaft / Nemlich / die Gerechtigkeit mit der Ungerechtigkeit / das Liecht mit der Finsternis / vnd Christus mit Belial.

Drey ding seind wider einander / Nemlich / Friede vnd Betrübniß / Liebe vnd leid / Ehre vnd Schande

Drey ding soltu deinen Kindern thun / Nemlich / straffen / lehren / vnd ernehren / so wirstu deinen Feinden nicht zum spot.

Drey andere ding soltu deinem Kinde thun / Nemlich / las ihm nicht den gewalt oder willen in der jugend / beuge ihn den Hals / die weil er noch jung ist / vnd sage ihm die Sitten / die weil er noch ein Kind ist.

Drey ding mus ein Mensch thun / der seine Arbeit richtig machen wil / Nemlich / mit Weisheit / mit bescheidenheit / vnd mit geschicklichkeit.

Drey ding kan man nicht sehen / Nemlich / eines Vogels flug am Himmel / eines Schiffes Weg im Meer / eines Pfeiles Weg wo er gangen ist.

Drey ding soltu dich hüten / Nemlich / vor Unkeuschheit / vor Erawrigkeit / vnd vor Zorn / die brechen das leben der Menschen.

Drey

Drey ding soltu thun/ Nemlich/ deinen Bru-  
der / Sohn / vnd Weib / setze nicht vber dich /  
Vbergib dein Gut vnd Haabe nicht einem an-  
dern diserweil du lebest / Vortraswe auch nie-  
mandt dein heimligkeit / das es dich nicht  
gerewe.

Drey ding betriegen die Menschen / Nem-  
lich / Warsageren / Zauberwerck / vnd Vogel  
geschrey / oder Trewne.

Drey ding sol man nicht zu sehr nötigen /  
Nemlich / in ein Auge stopffen / bringet zorn /  
ein Hertz mit Worten rüren / bringet gedan-  
cken / die Euter hart melcken / bringet Butter /  
oder Blut herfür.

Drey ding sol man meiden / Nemlich / den  
Wein / den Zanck / vnd den Zorn des Königes /

Drey ding sind schendtlich / Nemlich / verach-  
tunge des Armen / Heimligkeit offenbaren /  
vnd betrug mit auffsatz.

Drey ding gehen vor dem Blutuorgiessen /  
Nemlich / Fluchen / Trewen / vnd Schmach-  
wort.

Drey ding sind zum höchsten zu meiden /  
Nemlich Hoffart / Fresseren / vnd Vnkeusch-  
heit.

Drey

Drey ding soltu nicht am Tische annemen/  
Nemlich / die höchste stell / das erste Wort / vnd  
den ersten Bissen.

Drey ding ist man von hertzen feind / Nem-  
lich / einem Armen stolzen / einem reichen Lüge-  
ner / vnd einem alten Narren.

Drey ding sol man fliehen / Nemlich / die sün-  
de / eine Schlange / vnd ein böses Weib.

Drey ding las nicht vber dich kommen /  
das sie dich regiren / Nemlich / das Gesinde /  
die Kinder / vnd das Weib.

Drey ding kommen von einem bösen Weis-  
he / Nemlich / ein betrübet Hertz / ein trauri-  
ges Angesicht / vnd ein todt leid.

Drey ding vorderben Land vnd Stedte /  
Nemlich / vorrheterey / auffrhur / vnd schedliche  
lügen.

Drey tugend eines Weibes sein des Man-  
nes trost / Nemlich / ein freundliches / ein  
züchtiges / vnd ein vorschwigen Weib.

Drey ding sind kummerlich / Nemlich /  
wenn ein Krißman der des Krieges bericht  
ist mangel / die weysen vorstendigen voracht  
werden / vnd wenn einer vom rechten zum vnr-  
rechten felt / der ist ein bösewicht.

¶ Drey

Drey ding zeigen einen weysen / Nemlich /  
Zucht / Kunst / vnd Lehre.

Drey ding seind vnzellig / Nemlich / der Sande  
des Meers / die tropffen des Regens / vnd die  
Tage der Zeit.

Drey ding seind vnmesslich / Nemlich / die hö-  
he des Himels / die breite der Erden / vnd die  
tieffe des Meeres.

Drey ding seind verboten / Nemlich / Frage nicht  
nach den dingen so dich nicht angehn / vnd  
was dir nicht befohlen ist da las deinen vor-  
witz / vnd Frage nicht nach den dingen die dir  
verborgen sein.

Drey ding seind vnnütze / Nemlich / Wolck-  
en one Regen / Freunde one nutz / vnd Fein-  
de one schaden.

Drey ding seind strefflich vnd voracht /  
Nemlich / Gewalt one Güte / Reichthum one  
mildigkeit / vnd Armut one demut.

Drey ding soltu gros achten / Nemlich gut  
gerüchte / die weißheit zu hören / der alten ziel  
oder lehr nicht zu überschreiten.

Drey ding sol niemand thun / Nemlich sich  
selber loben / alte Freunde vbergeben / vnd sein  
Viche vorachten.

Drey

Drey ding soltu thun / Nemlich / halten das  
Geseze / den Armen gerne geben / die Gott-  
losen nicht lassen auffkomen.

Drey ding sollen dir lieben / Nemlich / ein  
ehrliche geburt / ein ehrlich Alter / vnd sterben  
in gerechtigkeit.

Drey ding seind vnmüglich / Nemlich / das  
Fewer zu wegen / den blast des Windes zu  
messen / vnd den vergangen tag wider zu  
bringen.

Drey ding seind wiederzern / Nemlich / der  
essig den Zehnen / der rauch den Augen / vnd  
ein falscher Bot dem der ihn gesand hat.

Drey ding werden nimer sat / Nemlich die  
Helle / das verderbnis / vnd die Augen.

Drey ding seind vnerforschlich / Nemlich /  
die Höhe des Himmels / die Tieffe der Erden /  
vnd des Königes Herze.

Drey ding dafür kan mā nicht wol / Nemlich /  
vorn Zorn / vorn Grim / vnd Vngestümb.

Drey ding bringen schaden / Nemlich / der  
Miltthat / der das Geseze verlest / vnd loben  
den Gottlosen.

Drey ding gebüren sich / Nemlich / die Geißel  
dem Roß / der Zaum den Esel / vnd die Rutte  
dem Narren.

Drey ding erhitzten vnd brennen / Nemlich /  
Die Kolen machen Gluth / das Holtz macht  
Fener / vnd ein zentischer Man macht ha-  
der.

Drey ding seind schwer / Nemlich / die Stei-  
ne / der Sand / vnd der Narren Zorn.

Drey Wehe seind / Nemlich / ein zweiuellhafftes  
Hertz / sündige Lippen / vnd den Henden die  
vbels thun.

Drey andere Wehe seind / Nemlich / den die  
Geduldt verloren haben / den die den rechten  
Weg verlassen haben / vnd den die böse Wege  
angenommen haben.

Drey Thugend soltu haben / Nemlich / den  
Armen neige dein Ohr / was du ihm schuldig  
bist das gieb ihm / Vnd antworte ihm sanfft-  
mütiglich.

Drey Thugend hat die Weisheit / Nemlich /  
giebet das Leben / nimpt auff die sie suchen /  
vnd wird ihm vorgehen in dem Wege der Ge-  
rechtigkeit.

Drey Thugend hat die rede der Weisheit /  
Nemlich / Zucht / Kunst vnd Lehr.

Drey ding geben einen Leiblichen Thon /  
Nemlich /

Nemlich / Pfeiffen / Psalter / vber die beyde  
ist ein freundliche vnd liebliche Zunge.

Drey ding vorderben den Menschen / Nemlich /  
Vortwitz / Vnuorstand / vnd Gefahr lieben.

Drey ding sol man fliehen / Nemlich / frembde  
Lehr / frembdes Weib / vnd frembdes Gut.

Drey ding sein vntreglich / Nemlich / ein armer  
Edelman / ein reicher Patwer / vnd ein  
Zehrhaftiges Weib.

Drey ding stehen vbel / Nemlich / Antworten  
ehe man gehöret hat / bey den Alten sich  
herfür thun / vnd schelten da man nicht  
grund hat.

Drey ding sein vbel gethan / Nemlich / zank  
cken vmb fremde sachen / bey den Sündern  
gemein zu haben / vnd verharren in bösen dingen.

Drey ding kommen zu ehren / Nemlich / der  
da weyse ist / der den Acker bauet / vnd der  
da rechtes thut.

Drey ding sein schnell / Nemlich / die gedancken  
des hertzens / das gesichte zu sehen / vnd  
die Ohren zu hören.

Drey hertzleid vorderben einen Man /  
S iij Nemlich

Nemlich / ein vngbezogener Son / ein herliche  
Tochter / vnd ein muwilliges Weib.

Drey ding soltu meiden / Nemlich / einen  
Narren / frembdes gut / vnd einen gewaltigern  
denn du bist.

Drey ding sein voracht / vnd doch begert /  
Nemlich / das Alter / des Feindes Todt / vnd  
nach der schrift zu leben.

Drey ding voracht man billich / Nemlich /  
einen schweligen / einen vnvorschempten / vnd  
einen vnbendigen Man.

Drey ding können alle ding ermessen / Nemlich /  
Zal / Mas / vnd gewichte.

Drey ding kan niemand ersettigen / Nemlich  
die Helle / einer Frayen Bauch / vnd die  
Erde wird Wassers nimmer sat.

Drey ding machen ein Land vnrug / Nemlich  
ein Knecht wenn er König wirt / ein Narr  
wenn er brods sat ist / vnd ein Feindseliges  
Weib wenn sie geehlicht wirdt.

Drey ding seind klüger denn die weysen /  
Nemlich / die Dines / die Ganintchen / vnd  
die Henschrecke.

Drey ding haben einen feinen gang / Nemlich  
der Lewe / der Han / vnd der Dohse.

Drey

Drey ding sein dafür man sich schemen  
sol / Nemblich / vor Vater vnd Mutter der  
hurerey / vor dem Fürsten vnd gewaltigen  
der lügen / vnd vor dem Richter vnd Oberen  
der Sünde.

Drey ding sol man nicht zu sehr reitzen /  
Nemblich / die Brüste / die Nase / vnd Zorn.

Drey ding sol man meiden / Nemblich / nerische  
mildigkeit / müßiggang / vnd burgschafft.

Drey ding sein zu fliehen / Nemblich / ein schnel-  
ler hader zündet das ferrer an / ein schneller  
zank vergeußt das blut / vnd der das argerech-  
en wil / bringet den Todt.

Drey dina vorkürtzen des Menschen Le-  
ben / Nemblich / der Wein / die Vnkeuschheit /  
vnd das Bad.

Drey ding fechten den Menschen an / Nemb-  
lich / der Leib / die Welt / vnd der Teuffel.



Das

Das Dritte Theil gemeiner  
Sprichwörter / allerley artz vnd  
Sitten / gut vnd böß  
belangende.



**D**rey dingen sol man nicht glauben ge-  
hen / Kauffleut schweren / Frauen  
wincken / vnd Hunde hincken

Drey dinge können nicht verborgen sein /  
Ein glüende Kohle im Stro / eine Spille in  
einem Sacke / vnd eine Hur vnter dem Da-  
che.

Drey

Drey ding gerahen selten / Nemlich / Schwes-  
ger / Erlenbogen / vnd falsche Pferde.

Drey dina seind / daran nichts gutes zuhof-  
fen ist / Nemlich Jugend ohne furcht / Jung-  
fraw ohne scham / vñ Dienstuolck ohne trew.

Drey ding behalten manlich Weib bey eh-  
ren / Nemlich / das sie vngesund / oder im  
Herzen stolz ist das ihr niemand gleichen  
mag / oder das sie einen ansehnlichen Man  
hat.

Drey ding reden die Wahrheit / Nemlich /  
Narren / Kinder / vnd truncken Leut.

Drey ding soltu fliehen Nemlich / Narren /  
falsche Zungen / vnd zeuchische Weiber.

Drey ding sind eitel / Nemlich / Wollust des  
Leibes / herrliche Gebew / vnd Reichthumb so  
obel gewonnen ist.

Drey ding vorderben / Nemlich / der Kost das  
Eysen / die Würmer das Holz / vnd die Not-  
ten die Kleyder / ja Trawrigkeit das Hertz.

Drey art der Hertzen werden es böse ha-  
ben / Nemlich / ein hart Hertz / ein zweifach  
Hertz / vnd ein böses Hertz.

Drey ding vorleschen / Nemlich / das Wasser  
das

das Feuer / die Almosen die Sünde / vnd ein  
sanffte Wort den Zorn.

Drey ding ist wenig zuhoffen / Nemlich / ein  
gezelter Wolff / ein getauffter Jude / vnd ein  
Pfaffe aus der Ehe.

Drey ding kommen nicht zu ehren / Nemlich /  
ein Dieb / ein Lügner / vnd ein hoffertiger Voro  
achter.

Drey ding haben grosse Reich zerstöret /  
Nemlich / heimlicher Meid / eigener Nutz /  
vnd junger Raht.

Drey ding machen arm / Nemlich / Frefel /  
Gewalt / vnd Vnrecht.

Drey ding zeigen einen Narren / Nemlich /  
viel reden / viel lachen / vnd ein Ohrenbleser.

Drey ding kleben nicht an der Wand / Nemo  
lich / Sand ohne Kalck / Asche ohne Wasser /  
vnd ein trucken Hader.

Drey ding soltu meiden / Nemlich / die groben  
Vngelehrten / die so viel schwätzen / vnd die  
dich machi haben zu tödten.

Drey ding sol man meiden / Nemlich / Glo  
cken giessen / Büchssen schiessen / vnd Teuffel  
bannen.

Drey

Drey ding nemen selten gut ende / Nemlich /  
Mehen geil vnd behende / Pfaffen kün / vnd  
Merken grün.

Drey ding find man selten / Nemlich Roth  
bart getrew / ein alt Pferd schew / vnd ein se  
lige Hure.

Drey ding taugen nicht vngeschlagen / Nemo  
lich / ein Nußbaum / ein Esel / vnd ein böses  
Weib.

Drey kan man nicht wol der Lügen straf  
fen / Nemlich / ein Weltgewanderten / einen  
Reichen / vnd einen Alten der lange gedev  
cket.

Drey ding liebet die Welt / Nemlich / gesun  
den Leib / Bar Geldt / vnd ein schön Weib.

Drey ding sind vnbestendig / Nemlich / Herrn  
gunst / Frauen liebe / vnd Aprillen Wetter.

Drey ding sind damit man nicht schertzen  
sol / Nemlich / mit Geistlichen dingen / vnd  
der nur ein Auge hat / vnd mit Jungfrauen.

Drey zeit im jahre / der sich da nicht fürcht /  
mus ein behertzter Wan sein / Nemo  
lich / einen Wolff vmb Marien Liechtmeß / ei  
nen Patern in der Fastnacht / vnd einen  
Pfaffen in der Fasten / wenn man beichten sol.

Drey ding sind zu wenig in der Welt / Nemlich / Jüden oder Wucherer / Huren / vnd Pfaffen / sonst dörfste ihr nicht alle tage mehr werden.

Drey ding werer nicht lange / Nemlich / Merken Blumen / Winter schön / vnd Pfaffen streit.

Drey ding seind / die lustig machen / Nemlich / wer nicht schlaffen mag / der gehe in die Predigt / welcher nicht beten kan / der fahre auff dem Mehr // vnd wer nicht trincken kan / gehe ins Bad.

Drey zielmas haben die Trincker / das sie müssen auffhören / Nemlich / wenn nichts in der Kanne ist / wenn der Ddem entgehet / vnd die Augen zehren.

Drey ding sind vorgeblich / vnd geschehen umbsonst / Nemlich / Wasser schöpfen mit einem Siebe / Vogeln gleich gehen wollen wenn sie fliegen / vnd einen todten ohne maß beweinen.

Drey ding zihen den Menschen vom ewigen Leben / Nemlich / die Armuth / die Kranckheit / vnd die Venus.

Drey ding schicken sich vbel / Nemlich / ein verzagter.

zagter Balbirer / ein barm hertziger Kriegs-  
man / vnd ein andechtige Hure.

Drey ding vorändern die Reich / Nemlich /  
Herrschafften / die Völcker / vnd vnrecht freffel  
gewalt.

Drey ding seind stoltze Hoffgesinde / Nem-  
lich / ein Bube auff einem Ross / ein Hure auff  
einem Schlos / vnd ein Laus im Grinde.

Drey ding stehen vbel / Nemlich / wenn sich  
der Pfaff der langen Kleyder scheinpt / eine  
Magd des Krankes / vnd der Bettler des  
Sackes.

Drey Boten sendet der Todt / ehe er kömpt /  
Nemlich / den Arzt / wenn der Wein nicht  
schmecket / vnd die Speise nicht dewet.

Drey zeichen gehen vor dem Tode her / Nem-  
lich / grawe Har / püchlicher Rücken / vnd die  
Kranckheit.

Drey ding seind nicht zuerforschen / Nem-  
lich / der Weg eines Adlers im fliegen / der  
Weg einer Schlangen im Kriechen / der Weg  
eines Schiffes im fliesen.

Drey ding sind gar lecherlich / Nemlich / Re-  
den mit seinen schatten / mit einem schein streit-  
ten / vnd sich zancken mit einem Narren.

Drey ding bedürffen nicht lobens / Nemlich /  
guter Wein / eines weisen Rede / vnd eines  
Mannes Rede wenn es ihm vbel gehet.

Dreyen dingen ist selten zuuortrawen /  
Nemlich / einem fremden Hunde / einem ge-  
borgeten Pferde / vnd einem geschwekshaff-  
tigen Weibe.

Dreyen dingen sol man allzeit folgen / Nemo-  
lich / Göttlicher warheit / seinen Eltern / vnd  
dem so einem etwas gutes reth.

Drey ding richten selten was fruchtbarli-  
ches aus / Nemlich / der auff's Meer seet / der  
einem viel gutes erzeiget vnd an ihm nicht be-  
wandt / vnd der mit einem Sieb den Wind  
auffhalten wil.

Drey ding sind allzeit für fromb zu ach-  
ten / Nemlich / der sein Weib allein liebet / ein  
Fürst so vorstendigen Rechten folget / vnd der  
so durch zorn beweget wird / sich den nicht  
vbereilen lest.

Drey ding machen einem selber vnglück /  
Nemlich / ein alter Man der ein jung Weib  
nimbt / ein Geiziger ohn Erben der sein Gut  
frembden lassen mus / vnd der Krieg wider  
billiche vrsachen erregt.

Drey

Drey ding seind einem selber am sched-  
lichsten / Nemlichen / so einer ander wil regie-  
ren / vnd ist selber zu straffen / so einer was su-  
chet / vnd ist ihm zuerlangen vnmüglich / vnd der  
bey vnuorstendigen sich wil rahts erholen.

Drey ding sol man nicht richten / Nemlich /  
Was Göttlich vnd heimlich ist / Was vntwis-  
send vnd vorborgen ist / Vnd was einem nicht  
befohlen ist.

Drey ding seind weiß / aber das vierdte am  
aller weisten / Nemlichen / der Schne / das  
Silber / vnd graue Haar / Aber ein auffricht-  
tig Herze am aller weisten.

Drey ding seind einander nicht zu vor-  
gleichen / Nemlichen / ein Wolff vnd ein  
Schaff / das Liecht vnd die Finsternisse /  
der Todt vnd das Lebend.


Ende.






Dresden +  
Gedruckt durch Gimmel  
Bergen von Lübeck.  
Im Jar/ 1588.











5

h

II

25

chlein

hrius/ etzlicher

ner Sprüchlein /

Schrifft/ vnd anderer  
in büchern gezogen:

dinge gerichtet.

öner vnd nothwen

/ vnd zu lernen sind /  
ligen Herzen zugut in  
fertiget.



sagt dis Büchlein /  
lein vnd nicht klein /  
ilign Schrifft /  
vnd böses betrifft /  
ich müge lenden /  
n thue abwenden /  
chworten genommen /  
kehrt bringet frommen.

1588.

Inches  
Centimetres

B.I.G.

Black  
3/Color  
White  
Magenta  
Red  
Yellow  
Green  
Cyan  
Blue

Farbkarte #13